



### EDITORIAL

## Nagpapadayon an rebolusyon ha Leyte

Ginsasaludaran han mga rebolusyunaryo nga pwera ngan han katawhan Pilipino an katawhan Leyteño, nga determinado nga nagpapasulong han demokratiko nga rebolusyon han katawhan atubangan han waray wantas nga pasista nga todoatake ngan kampanya nga disimpormasyon han rehimen Duterte.

Kadungan han pauru-utro nga deklarasyon nga "waray na insurhensiya" ha Leyte, dirudiretso liwat an kontra-rebolusyunaryo nga gerra han rehimen. Naghihimo an AFP han nakapokus nga operasyon militar ha Southern Leyte ngan iba nga parte han Leyte. Tikang pa hadton 2017 waray katukali an mga baryo han operasyon nga pankombat-paniktiksaywar, o mas kilalado yana komo Retooled Community Support Program. Nagpapabilin an mga detatsment han CAFGU. Pinaagi han "bug-os-nga-nasud nga daup," ngatanan nga ahen-sya ngan lokal nga gubyrno ginpapa-

gios para ha kontra-insurhensiya. Ginpagrabe, ginpahugaw, ngan mas brutal an kampanya nga pagpasurender ha masa. Pursigido nga ginpapi-gios an mga kontra-rebolusyunaryo nga elemento ngan aset agud man-gipit ngan magpasurender. Nagpapasamwak an kaaway han mga balita han buwa nga engkwentro, pagsurender, ngan pakaraot.

Kay ano nga sugad na la an paningkamot han rehimen Duterte nga puuhon an rebolusyunaryo nga kagiusan ha Leyte kun ungod nga nagdaug na ini? An kagiusan amo an pinakamakusog nga pwera nga nakikigbisog kontra ha paghahadi han mga agaron maytuna, dagko nga negosyante ngan langyaw nga kapitalista. Naglalaway hira ha mga asyenda, plantasyon, pan-enerhiya nga rekurso ngan minerales ha isla agud ira dambungon, ngan hi Duterte an prinsipal nira nga tagpanalipod. Gin-aatuhan han rebolusyunaryo nga kagiusan ini nga kon-

## Mga aset han 20th IB ha Las Navas, ginsirutan han BHB

DUHA NGA AKTIBO nga aset han 20th Infantry Battalion ha Las Navas, Northern Samar an ginsirutan han Bagong Hukbong Bayan-Rodante Urtal Command (BHB-RUC) sakob hin usa kasemana.

Ginsirutan han BHB-RUC si Bobby Mejos, kaapi han *death squad* nga ginkakatinan han 20th IB hadton Abril 29. Dabi hi Mejos ha ekstrahudisyal nga pagpatay kan Apolinario "Kap Pening" Lebico, kapitan han Brgy. San Miguel, Las Navas ngan ha mga aktibista. An grupo nga parupanmatay nga iya ginkakaapihan naluggop han mga bungto han Las Navas ngan Catarman ngan ginpapamunuan ni "Peping." Dabi liwat hi Mejos ha mga kontra-sosyal nga aktibidad sugad han pangawat, huygo, ngan panhubog.

Ginpatay liwat han BHB-RUC hi Jonie "Banong" Yanay Tortuna, aktibo nga aset han 20th IB ngan kagawad han Brgy. Paco, Las Navas hadton Mayo 5. Responsable hi Tortuna ha pagpatay ha duha nga sibilyan nga waray sala.

Antes hini, susrunod nga aksyon militar na an nahilansar han BHB-RUC. Gin-isnayp han mga Pula nga mangaraway an kaaway ha Brgy. San Jose han pareho nga bungto hadton Abril 1, ngan ginharas hira ha Sitio Inuman, Brgy. Tagab-iran hadton Abril 5.

Nahipatuman ini han BHB-RUC ha butnga han padayon nga operasyon nga Retooled Community Support Program (RCSP) ha Las Navas, partikular ha Sitio Inuman, Brgy. L. Empon, Brgy. Caputoan, Brgy. Lakandula, Brgy. Avelino, ngan Brgy. Camaniwan. ■

# Waray katapusan nga buwa han AFP ha Leyte

Dirudiretso an pagbuwa han Armed Forces of the Philippines. Samtang ruba nga plaka hini nga ginuuru-utro an deklarasyon nga “waray na insurhensiya” ha Leyte, dirudiretso hini nga ginbabalita an mga “sumurender” nga kaapi han Bagong Hukbong Bayan, mga buwa nga engkwentro, proyekto ngan aktibidad nga kontra-BHB. Diri hini matahuban nga nagpapadayon an rebolusyon ha isla; an ira mga buwa usa ha mga nagduduso ha mas damo nga katawhan nga umapi hini.

## 1. Mga buwa nga pagsurender

Ha pinakaurhi nga sumat han BHB-Mount Amandewin Command (BHB-MAC), yana nga tuig waray bisan usa nga pultaym nga kaapi han BHB an sumurender o nadakop nga ginpasurender han kaaway.

Kundi, mga parag-uma nga gintatahapan nga mga suporter o aktibo kuno ha kagiusan amo an pinugos han mga sundalo, gintarhug nga pasurenderon ngan ginpirit nga magerbe koma ira aset. Sigon ha kaaway, nahimo an mga “pagbalik-loob” tungod kay naghimo hira han negosasyon ngan boluntaryo nga sumurender an “surenderi.” Kundi ha kamatuoran, sumurender hira kahuman han serye han panharas ngan pagbalik-balik ha ira tubtub na la napaamin ngan nakigkooperar hira ha militar.


Pira ha mga sibilyan nga ginpirit han AFP nga sumurender amo hira Rogie Delantar, tsirman han organisasyon han mga parag-uma ha Kananga

upod an 56 nga parag-uma han Brgy. Rizal hini nga bungto; Arlen Bactol, kaapi han organisasyon han mga parag-uma ha Carigara, sugad liwat an iya asawa nga hi Joseph Bactol, nga hadto pa biktima han panarhug ngan pwersahay nga pagpa-asset han 19th IB han nakapakat pa ini ha Leyte; Preciano “Penoy” Galleon, usa nga hadto anay Pula nga mangaraway nga maiha na waray ha serbisyo kundi ginpatay han kaaway hadin Enero tungod kay dumiri sumurender. Ha pinakaurhi, mayda liwat 15 nga parag-uma ha Kananga nga pauru-utro nga ginpapatagaw han 93rd IB ha kampo.

Mayda liwat kunohay surenderi nga hinimuan han ngaran ngan pusisyon ha kagiusan, sugad kan “Madi”/“Arlen,” nga na-

gios kuno ha Carigara kundi diri man ginkikilala didto. Sigon ha BHB-MAC, posible nga hinimu-himo la ini komo kontra-rebolu-syunaryo nga propaganda.

*“Waray katapusan...,” sundan ha paypay 3*



*“Nagpapadayon...,” tikang ha paypay 1*

sabuhay han mga burukrata-kapitalista, despotiko nga agaron, pasista nga AFP-PNP, ngan mga traydor nga karuyag bungkagon an pagkakaurusa han masa, bawion an ira mga kadaugan ha pakigbisog, ngan igpadayon an waray kaluoy nga paniniyupi ngan pananalumpigos kontra ha masa nga tiniyupi nga rinaugdaug.

Diri bisan san-o masasantop han kaaway nga amo ini an diklap nga gintitikangan han kalayo han rebolusyon. Samtang gintitiyupi ngan gintatalumpigos an katawhan, mayda hira rason para magrebolusyon. Anuman nga paningkamot han kaaway nga puypuyon

an rebolusyon mawawarayan-pulos tungod ha padayon nga paningkamot han Partido, BHB, ngan masa nga magpukaw, magorganisa ngan makigbisog para ha tinuod nga katalwasan ngan demokrasya.

Amo ini an mga hinungdan kun kay ano nahimo gihapon han BHB ngan masa nga ipasulong an gerra han katawhan ha Leyte. Nakaglansar hira han mga aksyon militar agud sirutan an mga nagpapakuri ha katawhan. Ginpapakyas nira an kampanya nga pagpasurender pinaagi han diri pagtambong ha mga patawag han militar ngan pagrek-lamo ha pangabuso han mga sundalo

ha ira lokal nga upisyal. Komo baton ha pakuri nga lockdown, nakaglansar an mga parag-uma han kontra-pyudal nga pakigbisog sugad han paginsister ha katungod ha gin-uuma nga tuna, pagpaumento han bahinay ha kita, ngan kolektibo nga produksyon.

Ini nga diwa nga mapan-ato han mga Leyteño naserbe nga inspirasyon ha katawhan han Eastern Visayas, nga maatubang han mas dako nga ayat ha natikapintas nga todo-gerra ni Duterte. Pumurot kita han mga leksyon tikang ha ira agud pakyas an ini nga todo-gerra ngan ipasulong an rebolusyon ngadto ha kadaugan. ■



"Waray katapusan...", tikang ha paypay 2

## 2. Mga buwa nga engkwentro

Usa nga dako nga buwa an engkwentro kuno giutan han BHB ngan 14th IB ha Old Guinsaugon, St. Bernard, Southern Leyte hadton Pebrero 24. Sigon pa ha kaaway, nakakumpiska kuno hira han granada ngan bala han M203. Kundi sigon ha BHB-MAC, waray pa nahitatabo nga engkwentro hini nga erya tikang hadton Septyembre 2020.

Diri na urusahon ha AFP ha Leyte an pagpasamwak han hinimu-himo nga "engkwentro." Hadton 2019, nagsering liwat ini nga nakaengkwentro nira an BHB ha Brgy. Caghalo, Carigara ngan ginhatagan pa han medalya an mga sundalo nga nakaupod hini nga "agway."

Nagpakanap liwat an kaaway han mga buwa nga balita agud magdurot han disoryentasyon ngan kahadlok ha masa. Han naghihimo hira han "serbisyo caravan" ha Silago hadton Pebrero 14, nagpasamwak hira han balita nga mayda kuno damo nga BHB nga umabot tikang ha Mindanao. Nagkamayda liwat kuno hin "engkwentro" sapit han Libertad ngan Abuyog ngan didto kuno ha Silago umatras an BHB kahuman nira mahiagum han damo nga kaswalti. Puros ini buwa nga balita.

## 3. Mga buwa nga proyekto

Usa ha mga pinakadako nga buwa nga ginpapasamwak han AFP diri la ha Leyte kundi ha bug-os nga Pilipinas an kabahin ha "P20 milyon" nga ihahatag kuno ha mga barangay nga na-"clear" na han BHB ilarum han Barangay Development Program han National Task Force to End Local Communist Armed Conflict (NTF-ELCAC.) Ha Southern Leyte ngan ha ikalima nga distrito han Leyte, ginpatawag han 14th IB an mga upisyal han barangay agud magpatapod hini nga balor han mga proyekto nga pan-imprastruktura.

Kundi usa nga barangay ha Bontoc, Southern Leyte an nagreklamo kay karuyag kunta nira han proyekto nga pakabuhi ngan patubig, kundi waray ini tuguti han militar tungod kay kinahanglan kuno pan-imprastruktura an proyekto. Pag-insister han mga upisyal han barangay, diri na poyde an kalsada tungod kay sementado na ini tubtub ha baryo. Baton han militar, iparuba an kalsada ngan ipautro an pagsementto hini. Posible nga sugad liwat an nahitabo ha mga barangay han Pinamunuan, Mahaplag, ha Ulishan, Bontoc, ngan San Juan, ha Sogod nga amo kuno an hahatagan hin tig-P20 milyon.

Buwa liwat an "showcase" nga pabalay ha Brgy. Daja Daku, San Isidro, Leyte para ha mga "surenderi." Grabe nga pagbirikis ini han kamatuoran tungod kay an ginsering nira nga "surenderi" mga parag-uma nga membro han organisasyon han parag-uma nga duha kadekada na nga ginpapakigbisugan an ira katungod ha tuna nga ginlulupot han despotiko nga agaron maytuna nga Larrazabal. Ginpapiirma an mga parag-uma nga sakob hin tulo katuig kinahanglan gumikan na hira ngan bumalhin na ha pabalay. Konsabuhay ini han mga Larrazabal, han reaksyunaryo nga gubyrno, AFP ngan han traydor nga hi Thelma "Mayang" Pundulanan agud bawion an kadaugan ha kontrapudal nga pakigbisog han mga paraguma ngan pagawson hira komo mga "surenderi."

## 4. Mga buwa nga aktibidad

Pira kabeses liwat gin-uwat an mga lokal nga upisyal ngan ordinaryo nga molupyong agud mapatambong ha mga "peace rally." Hadton Pebrero 2, gintuman ha adlaw han pagbista ha Senado hiunong ha Anti-Terror Law an duha nga kontra-komunista nga rali nga ginpangunahan kuno han kabataanun an ha Maasin City ngan Bontoc. Sigon ha BHB-MAC, napiritan an mga upisyal han Sangguniang Kabataan nga tumambong tungod kay kun dumiri hira, waray igrerelis nga pondo an lokal nga gubyrno nga ginduduso liwat han militar.

Ha iba nga kaso, nasosorpresa na la an mga tawo ha mismo nga aktibidad kay iba an gindedeklara nga tuyo han imbitasyon. Danay, an munisipal nga gubyrno an nagpapatawag kundi ha aktwal an mga sundalo an nagdudumara han miting. Naoobliga an mga umatendir nga tapuson an miting tungod kay gintatarhug hira. Mayda liwat kaso nga ha pagtikang han miting, proyekto an gin-eerestoryahan kundi niruniyan, nagbululadas na han itom nga propaganda an tagapagyakan ngan kun tiunan-o hira mapapagios para ha kontra-insurhensiya.

Luyo hini nga pan-uwat, darudamo gihapon an diri natambong ha mga patawag han militar. Kadam-an ha mga aada ha "peace rally" mga sundalo gihapon ngan an ira mga kapamilya. ■



Mga naghuhuramentado nga sundalo

## Balay ha uma, nasunog ha hinimu-himo nga engkwentro han 87th IB

USA NGA PAYAG ha uma an nasunog kahuman manmomba ngan mangistraping an 87th Infantry Battalion agud pagawason nga nagkamayda ini hin "engkwentro" kontra ha Bagong Hukbong Bayan ha Brgy. Boco, Canavid, Eastern Samar hadton Abril 8.

Sigon ha report han BHB-Sergio Lobina Command (BHB-SLC), ginistraping han gintig-ob nga pwera han Bravo ngan Charlie Company han 87th IB an duha nga bulod han mga banti dapit alas-10 han aga tungod kuno kay mayda kampo han BHB didi.

Pag-abot han alas-12 han udto, duha nga helikopter nga MG-520 an naglupad-lupad agud mangistraping ngan unom kabeses nga maghulog han bomba. Tulo kaoras ini nga pan-momba nga nagresulta han karuba ngan kasunog han usa nga balay.

Kahuman han panmomba, kinadto ha baryo an mga sundalo agud magsumat ha taghimaryo hiunong ha "engkwentro." Nagbuwa pa hira nga mayda hira napatay nga 15 nga Pula nga mangaraway.

Ginpanhimuwa han BHB-SLC an hinimu-himo nga engkwentro. Ginkundenar hini an 87th IB ha pagruba hini propyedad han mga sibilyan ngan pagbutang ha mga komunidad ha kadelikaduhan tungod ha waray wantas nira nga pangatake.

"Waray hira makaigo hin bisan usa nga Pula nga mangaraway, kundi nahimo nira nga magkarag han pampubliko nga pondo ngan ringgalon an pagpakabuhi han mga parag-uma ha lugar. Nahahadlok na nga magtrabaho ha uma an mga parag-uma ha mga militarizado nga baryo tungod ha mga operasyon kombat han militar. Nakakadugang la hira ha pagkukuri han katawhan ha butnga han pandemya ngan krisis," sigon ha BHB-SLC.



## Test fire ha umhanan, ginhimo ha butnga han kat-ani

GINDIWARA LA HAN mga pwera han 52nd IB, 14th IB, ngan CAFGU an katalwasan han mga nag-aani nga parag-uma han mangistraping ngan manganyon ini para ha test fire ha mga uma ha Sitio Canrumbay, Brgy. Jicontol, Dolores, Eastern Samar hadton Abril 24.

Sigon ha BHB-Sergio Lobina Command (BHB-SLC), tikang alas-11 han aga tubtub alas-4 han kulop nagpabuto han masinggan, mortar ngan grenade launcher an mga sundalo ha usa nga dam nga apiki ha sa-pa ngan naatubang ha mga uma ha lugar.

Reklamo han mga residente ha BHB-SLC, nagpahibaro la ha ira an mga sundalo kabahin han test fire alas-7 han aga hiton nga adlaw. Nahadlok hira ha pagpipinabuto han mga sundalo nga ginhimo samtang aada hira ha uma para mag-ani.

Kahuman manamok ha umhanan, dumiretso an mga sundalo ha Sitio Canrumbay ngan kasapit nga Brgy. Osmeña agud manguna han huruygo, burublang ngan huruygo. Sigon ha BHB-SLC, destroso, pakasamok ngan peligro ha mga sibilyan an ginhihimo han sundalo ha kabaryuhan. ■

### HA KAMATUORAN

## Seminar han 20th IB ha Las Navas, mapan-uwat!

Ginrereklamo han katawhan ha Las Navas an **pag-uwat ha ira han 20th Infantry Battalion** agud mapatambong ha usa nga kontra-komunista nga rali ha bungto ha okasyon han **anibersaryo han BHB** hadton Marso 29.

Ha Brgy. San Francisco, usa kaadlaw antes hini, nag-anunsyo anay an mga upisyal han barangay ha mga residente nga magkakamayda kuno hin "seminar" an militar ha bungto nga angay nira

tambungan tungod kay "**para ini ha [ira] kaupayan.**" Umatubang liwat ha ira hi **2nd Lt. Andrade** han 20th IB agud kumbinsihon hira nga tumambong.

Kundi pag-abot nira nga bungto, kinalasan na la an mga parag-uma nga kontra-BHB nga rali ngay-an an ira gintambungan. Dugang pa, an mga batan-on nga upod nira ha aktibidad mga ginhakot han militar ngan ira **ginbaydan agud tumambong.**